

O Fuamoa ma Pene

*Sa lagona le vevela
o foliga o Izzy. Tuu atu
se tasi o ana pene? Sa
le mafai ona ia faia!*

Saunia e Kate Anderson
(E faavae i se tala moni)

O lenei tala sa tupu i le ISA.

Valu . . . iva . . . sefulu!

Sa tuu ma le faaeteete e Izzy le fuamoa lona 10 i lana ato. Sa totogi e Tamamatua lana pene e tasi i le fuamoa. Talu ai e 10 fuamoa, o le a maua e Izzy le 10 sene i le aso.

Sa felelei solo moa ma feotei a o felafaoiina atu a latou meaei e Izzy. Sa faaeteete o ia e tausisia le mama o lona sakete o le Aso Sa. Sa tatau ona fafagaina moa i aso uma, e oo lava i le Aso Sa. Ma sa tatau ona aoina fuamoa.

"Faafetai mo fuamoa, matuamoa!" sa fai atu ai Izzy. "Ma faafetai mo le 10 sene!"

Sa tilotilo atu Izzy i fuamoa matagofie i lana ato. E le manaomia uma e Tamamatua le 10. O le a ia tuuina atu le tele o nei fuamoa i le aiga o Izzy.



Ae sa fiafia o ia e fai se fuamoa mo lana meaei o le taeao. Sa alu atu o ia i le isi itu o le fanua ma agai atu i le umukuka a Tamamatua.

"Kiliva Faapitoo!" sa valaau atu ai Izzy.

"Faafetai!" Sa ataata Tamamatua. "Ou te lagona le fiafia tele pe a e aumaia ia te a'u se fuamoa."

Sa tuu atu e Izzy ia te ia le fuamoa sili ona tele mai le ato. "Ou te alofa ia te oe Tamamatua," na ia fai atu ai.

Sa ta ta e Tamamatua le fuamoa i le faatausiusiuga o se falai vevela ma ta'e ai. O le lega lanu auro o le fuamoa sa taape i totonu o le falai.

"Ia tago loa e aveese au pene e 10 mai la'u fagu."

Na fusi mai e Tamamatua Izzy. "O le a ou vaai ia te oe i le lotu!"

Sa tamoe Izzy i le fale ma isi fuamoa e iva i lana ato ma ni pene iila se 10 o loo tatagi i lana taga.

Ina ua alu o ia i le Peraimeri, sa i ai lava ia Izzy ana pene i lona taimi. Sa ia tuu lona lima i lana taga e uu a o ia faalogologo i le lesona.

"O le sefuluai o le taimi lea tatou te tuuina atu ai le tasi vaesefulu o mea tatou te maua e toe foi atu ai i le Tama Faalelagi," o le tala lea a Sister Ayala. "Afai la e 10 sene, e te tuuina atu se sene se tasi e avea ma sefuluai."

Sa lagona le vevela o foliga o Izzy. Tuu atu se tasi o ana pene? Sa le mafai ona ia faia! Sa ia uu mau lana tupe.

"Aisea e manaomia ai e le Atua a tatou tupe?" na fesili atu ai le uo a Izzy o Jaime. "Na te le faaagaina foi se tupe."

Na ataata Sister Ayala. "Ae ua silafia e le Atua e manaomia tupe e totogi ai mea e pei o lenei fale lotu matagofie," sa ia fai atu ai. "Ua Ia talosagaina i tatou e totogi le sefuluai ina ia mafai ona tatou taulimaina manaoga o le Ekalesia. Ae o le mea e sili

ona taua, e finagalo o Ia e faamanuia i tatou. Afai tatou te totogiina a tatou sefuluai, ua folafola mai e le Atua ia i tatou faamanuiaga mai le lagi."

Sa lagona e Izzy ia pene i lana taga ma mafaufau e uiga i le fuamoa a Tamamatua.

O fuamoa e mai i ana moa, ae sa na o le tasi lava na ia tausisia mo ia lava. Sa matuai fiafia lava Tamamatua e aumai se fuamoa i taeao uma lea na manao ai Izzy e avatu ia te ia le fuamoa sili ona lelei. E le gata i lea, sa sili atu lona alofa ia Tamamatua nai lo fuamoa. O mea e pito sili ona taua lena.

"O lea la," na fai lemu atu ai Izzy, "tatou te toe avatu i le Tama Faalelagi sina mea itiiti ua Ia tuuina mai ia i tatou. Ona tatou te mananao e faaali atu ia te Ia tatou te alolofa ia te Ia."

"Lena tonu lava." Sa tuuina atu e Sister Ayala i tamaiti taitoatasi se teutusi o le sefuluai.

Sa aumai e Izzy ana pene iila e 10 ma faitauina i luga o ona vae.

Valu . . . iva . . . sefulu.

I le lagonaina o le mafanafana, na ave ai e Izzy le sene sili ona iila ma tuu i totonu o lana teutusi e avatu i le Tama Faalelagi.

"Faafetai mo pene," sa ia musumususu atu ai. "Ma faafetai mo faamanuiaga mai le lagi." ●

